



Broj:01,02,03,/11-05-1-309/15

Sarajevo: 21.12.2015.godine.

IZVJEŠTAJ
o godišnjem zasjedanju Parlamentarne skupštine Parlamentarne
dimenzije Centralnoevropske inicijative,
održane u Skoplju (Makedonija)
9. - 11. decembra 2015.

U okviru makedonskog predsjedavanja Centralnoevropskom inicijativom u Skoplju je od 9. do 11. decembra 2015. održano godišnje zasjedanje Parlamentarne skupštine Parlamentarne dimenzije Centralnoevropske inicijative. Glavne teme zasjedanja bile su "Migracijska kriza kao globalni problem i izazov" te "Međusobno povezivanje regije Centralnoevropske inicijative u kontekstu Evropske unije". Zasjedanju je u ime Parlamentarne skupštine BiH prisustvovala Senaida Bešlagić, sekretar Delegacije. Tokom zasjedanja održani su i sastanci komiteta te su izabrani predsjednici i potpredsjednici tri komiteta. Na godišnjem zasjedanju PDCEI-a učestvovali su predstavnici delegacija nacionalnih parlamenata iz Albanije, Austrije, Bosne i Hercegovine, Bugarske, Hrvatske, Češke, Mađarske, Italije, Crne Gore, Rumunije, Srbije, Slovenije i Ukrajine kao i predstavnici Generalnog sekretarijata Centralnoevropske inicijative u Trstu, Italiji. Sastanak je zaključen usvajanjem Završne deklaracije PDCEI-a kojom su date daljnje smjernice za rad na navedenim područjima nacionalnim parlamentima država članica Centralnoevropske inicijative.

Glavni akcenti: U okviru makedonskog predsjedavanja Centralnoevropskom inicijativom od 9. do 10. decembra 2015., u Parlamentu Republike Makedonije održano je zasjedanje Parlamentarne skupštine Parlamentarne dimenzije Centralnoevropske inicijative. Glavne teme rasprava bile su: "Migracijska kriza kao globalni problem i izazov" te "Međusobno povezivanje regije Centralnoevropske inicijative u kontekstu Evropske unije".

Domaćin ove aktivnosti bila je delegacija makedonskog parlamenta u Parlamentarnoj dimenziji Centralnoevropske inicijative koju je predvodila predsjedateljica makedonske delegacije Liljana Siljanovska. Na sastanku su učestvovala delegacije nacionalnih parlamenata iz Albanije, Austrije, Bosne i Hercegovine, Bugarske, Hrvatske, Češke, Mađarske, Italije, Crne Gore, Rumunije, Srbije, Slovenije i Ukrajine kao i predstavnici Generalnog sekretarijata Centralnoevropske inicijative u Trstu, u Italiji.

Prije zasjedanja Skupštine održani su i sastanci tri generalna komiteta: za politička, ekonomska i pitanja kulture, a bili su posvećeni temama migracija, saradnje u makroregionalnim strategijama kao i budućeg proširenja Evropske unije.

Zasjedanje Skupštine otvorila je predsjedateljica makedonske delegacije u Parlamentarnoj dimenziji Centralnoevropske inicijative Juliana Siljanovska, koja je istaknula da je Makedoniji čast nakon trinaest godina ponovo predsjedavati najstarijom regionalnom inicijativom te je dodala kako je upravo veliki odaziv delegacija pokazatelj interesa zemalja članica za razgovor o temama od zajedničkog interesa.

Učesnicima su se na početku obratili Trajko Veljanoski, predsjednik makedonskog parlamenta, Erik Csernovitz, zamjenik generalnog sekretara Centralnoevropske inicijative, Margot Klestil Löffler, pomoćnica generalnog sekretara CEI-a, te Dragančo Apostolovski, zamjenik nacionalnog koordinatora Makedonije u Centralnoevropskoj inicijativi.

U uvodnom izlaganju predsjednik makedonskog parlamenta Trajko Veljanoski istaknuo je da su se od sastanka Parlamentarnog odbora Centralnoevropske inicijative, održanog u maju 2015. u Skoplju, dogodile mnoge stvari koje su zabrinjavajuće za sve zemlje članice, te istovremeno potvrđuju princip da se samo kroz regionalnu saradnju na visokom institucionalnom nivou mogu zajednički riješiti problemi s kojima se suočavamo. Dodao je kako prvobitno misli na izbjegličku krizu i sve izazove, probleme i prijetnje koje nam dolaze ili bolje rečeno su već ovdje. Osvrnuo se na tragične događaje u Parizu te istaknuo kako upravo to potvrđuje stvarnu opasnost od terorizma koji dolazi iz tzv. islamske države, što realno nema nikakve veze sa islamom kao religijom. Naglasio je da je dužnost svake države i vlade da zaštiti svoje građane, ali u isto vrijeme, kroz zajedničku saradnju, pridonese globalnoj borbi protiv terorizma. Veljanoski je naglasio da je Makedonija od Evropske unije do sada dobila vrlo malo pomoći i sredstava za rješavanje izbjegličke krize te je ujedno apelirao na zemlje članice CEI-a koje su države članice Evropske unije da ne dopuste da se izbjeglička kriza rješava parcijalno, tj. da se određene zemlje nose same s problemima koji proizlaze iz izbjegličke krize, istaknuvši kako je solidarnost princip na kojem se zasniva moderna Evropa te da su mir i sigurnost nerazdvojne kategorije.

Govorila je i Margot Klestil Löffler, pomoćnica generalnog sekretara CEI-a, koja je istaknula da su za Evropu trenutno izuzetno teška vremena i da se svakodnevno suočavamo s nizom izazova te da prisustvuje ovom sastanku kako bi dala podršku i potvrdila predanost operativnim ciljevima Centralnoevropske inicijative.

U okviru rasprave učesnicima su se obratili Oliver Spasovski, ministar za unutrašnje poslove Makedonije, i Emira Mehmeti, predsjednica Odbora za evropska pitanja makedonskog parlamenta. Ministar unutrašnjih poslova Spasovski istaknuo je kako izbjeglička kriza nije neuspjeh pojedinih zemalja ili Evrope nego neuspjeh cijelog čovječanstva jer protok ljudi koji su prisiljeni tražiti bolju budućnost u drugim zemljama, van svoje domovine iz jednog ili drugog razloga govori da se suočavamo s globalnim neuspjehom zbog nerješavana uzroka migracijskih kretanja. Izbjeglice bježe od sukoba, siromaštva, diskriminacije i očaja, naglasivši kako se svima njima treba omogućiti međunarodna zaštita. Spasovski je rekao da je saradnja zemalja regije i cijele međunarodne zajednice ključna za rješavanje trenutne krize koja poprima nesagledive razmjere. Zaključio je da su međunarodna saradnja i pomoć, pravovremena razmjena informacija, redovno i nesmetano komuniciranje te česti susreti najviših tijela zemalja koje su pogođene izbjegličkom krizom i međunarodnih organizacija s ciljem donošenja zajedničke odluke koja će ići u prilog svima, ključ za očuvanje nacionalne sigurnosti svake zemlje kao i poštivanje humanog aspekta situacije u kojoj se svi nalaze.

U raspravi je također istaknuto da se izbjeglička kriza pokazala kao veliki izazov za Evropu i da se nijedna zemlja ne može sama nositi s posljedicama te da se treba naći rješenje na panevropskom nivou. Učesnici su skrenuli pažnju i na nedavne terorističke napade koji upućuju na činjenicu da se svi suočavaju s transnacionalnom prijetnjom te da svi zajedno treba da se bore protiv terorizma.

U drugom dijelu zasjedanja, kao prioritet izdvojena je potreba za daljnji razvoj saobraćajne infrastrukture.

Istaknuta je važnost ulaganja u drumski, željeznički i zračni saobraćaj te potreba za bržim provođenjem reforme kao i izgradnja ključnih koridora. Naglašeno je kako će puna funkcionalnost koridora omogućiti bolju povezanost zemalja i brži ekonomski razvoj.

Učesnici su izrazili zadovoljstvo temama koje su odabrane za raspravu, koje su ocijenili kao izuzetno važne za sigurnost i integraciju regije i Evrope.

Zaključak: Tokom zasjedanja istaknuto je kako je neophodno izbjegličku krizu posmatrati ne samo kao regionalni, već kao evropski i globalni problem, pa su zemlje članice CEI-a koje su države članice EU i njihove vlade pozvane da preduzmu konkretne mjere kako bi se problemi koji proizilaze iz izbjegličke krize rješavali zajednički. Naglašeno je da se do rješenja može doći, prije svega, zajedničkim sinhroniziranim djelovanjem, a da svaki jednostrani potez može izazvati lančanu reakciju i probleme zemljama u regiji. Također je istaknuta neophodnost prepoznavanja razlike između izbjeglica koji napuštaju područja zahvaćena ratom i ekonomskih migranata čiji je cilj, prije svega, unapređenje kvaliteta života. Kao jedan od zaključaka godišnjeg zasjedanja iskazano je i stajalište da će integracije zemalja Zapadnog Balkana u NATO doprinijeti sigurnosti, miru i stabilnosti u regiji i ubrzanju njihovog puta u članstvo u Evropskoj uniji.

Ovo je ujedno bila i posljednja parlamentarna aktivnost makedonskog predsjedavanja Centralnoevropskom inicijativom te je istaknuto da sljedeće godine predsjedavanje preuzima Bosna i Hercegovina.

Na kraju zasjedanja usklađen je i usvojen tekst Zajedničke deklaracije PDCEI-a u kojem su objedinjeni zaključci i date daljnje smjernice nacionalnim parlamentima država članica Centralnoevropske inicijative.

Izvještaj uradila:

Senaida Bešlagić

Sekretar Delegacije Parlamentarne skupštine BiH u PSPDCEI-a

